

畿輔通志卷一百九十八

列傳六 南北朝二

南北朝

天津府

李鉉 楊元懿

刁遵 子整 孫冲 遵族子雙

王伽

高世衡

正定府

魏釗 子彥 孫長賢

魏季景 父鸞

張普惠

石祖興

甄琛 子楷 從父弟密 張纂 纂叔感 感子宣軌

魏子建 父悅

魏質

房蚪

順德府

游雅

游明根 子肇 肇子祥

王仲興

李德饒弟德侶

廣平府

宋宣父洽
孫瓊

宋弁祖愔

房亮弟悅

監伯陽

宋翻弟毓
世景子季儒

叔集道璵

崔高客

潘永基

劉藻

傅永子叔偉

崔瑾

荀士遜

房山基

大名府

李崇從弟平

曹世表祖謨
父慶

華秋

宣化府

張袞子度
修虎

孫誕度曾孫白澤

白澤子倫白澤姪

朱瑞弟騰

燕崇常陟

邵洪哲兄伯川

南北朝

天津府

李鉉字寶鼎渤海南皮人九歲入學書急就篇月餘便通家
素貧常春夏務農冬乃入學年十六從浮陽李周仁受毛詩
尙書章武劉子猛受禮記常山房蚪受周官儀禮漁陽鮮于
靈馥受左氏春秋復與同里楊元懿河間宗惠振等結友詣
大儒徐遵明受業居門下五年稱高第年二十三乃獨潛居
討論是非撰定孝經論語毛詩三禮義疏及三傳異同周易
義例合三十餘卷用力甚勤不就枕者三年每睡假寐而已
年二十七歸養二親因教授鄉里生徒恒數百人燕趙間言
經者多出其門以鄉里少書乃之京師博覽羣書舉秀才除
太學博士及李同軌卒齊神武令文襄妙簡碩學以教諸子

文襄以鉉應徵詣晉陽時中山石曜北平陽絢北海王晞清河崔瞻廣平宋欽道及工書人韓毅同在東館師友諸王鉉以去聖久遠文字多有謬悞乃據說文倉雅刪正六藝經注中謬字名曰字辯天保初詔鉉參議禮律乃兼國子博士復詔與通直常侍房延祐國子博士刁柔參考新歷得失尋爲正國子博士廢帝爲太子時文宣詔鉉以經入授甚見優禮卒特贈廷尉少卿及還葬王人將送儒者榮之元懿惠振官俱至國子博士

北齊書

刁遵字奉固渤海饒安人父雍魏持節侍中都督揚豫兗徐四州諸軍事征南將軍徐豫二州刺史贈儀同三司冀州刺

史東安簡公也

魏書

金石萃編刁遵墓誌

兄纂字奉宗官中書侍郎早卒

遵襲雍爵太和中例降爲侯景明中除相州魏郡太守

魏書

下寬明德洽于民

金石萃編
刁遵墓誌

還爲太尉諮議參軍年七十志

力不衰延昌三年遷司農少卿尋拜龍驤將軍洛州刺史遵

招誘有方梁新化太守杜性新化令杜龍振平陽令杜臺定

等率戶三千歸遵熙平元年七月卒年七十六贈平東將軍

兖州刺史諡曰惠侯有子十三人長子楷字景伯州舉秀才

早卒子冲字文助

魏書北史
字文郎

十三而孤以孝聞其祖母司空

高允女也哀其早孤撫養尤篤及免喪遂從師於外自同諸

生於時學制諸生悉日直監厨冲雖有僕隸不令代己身自

炊爨每師授之際用心精專不捨晝夜遂通諸經及陰陽圖

緯天文風角之書當世服其精博刺史郭祚聞其名訪以疑

義冲應對如流羣疑盡釋太守范陽盧尙之刺史河東裴桓

皆徵冲爲功曹主簿非所好也受署而已不關事務惟以講

學爲業遠方之人來受業者歲數百人延昌中世宗舅司徒高肇用事冲抗表極言其非太傅清河王懌覽而歎息冲以嫡傳祖爵東安侯京兆王繼爲司空辟記室參軍肅宗將親釋奠國子助教韓神固率諸儒詣國子祭酒崔光吏部尙書甄琛舉冲才學乃奏而徵焉及卒國子博士高涼范陽盧道侃盧景裕等復上狀陳冲業行賜諡曰安憲先生祭以太牢子欽字志儒早亡楷弟尙字景勝本州治中早卒尙弟整字景智少有大度頗涉書史爲郡功曹太和十五年爲奉朝請高祖都洛親自臨選除司空法曹參軍高祖南討以廣陽王嘉鎮荊州整爲嘉外兵參軍事尋轉太尉咸陽王禧外兵參軍景明中除給事中領本州中正尋除尙書左中兵郎中正始中梁江州刺史王茂先伐魏南境詔整持節爲平南將軍

楊大眼軍司禦梁師大破茂先斬梁輔國將軍王花等永平
初以軍功除員外散騎常侍仍除郎中延昌三年秋世宗親
選百官於朝堂拜右軍將軍仍除郎中尋轉驍騎將軍未幾
丁父憂相州刺史山陽王熙在鄴起兵討元乂事敗遇害傳
首京師熙之親故莫敢視整弟婦熙姊也整竟收其屍藏之
後乃還熙所親乂怒因誣整將叛收整與弟宜及子恭等幽
繫之賴御史王基前軍將檢事使魏子建力救獲免後自征
虜將軍出除范陽太守時四方多故而整郡獨全整去官後
郡尋被陷靈太后反政除安南將軍光祿大夫永安初拜金
紫光祿大夫二年兼黃門元顥入洛用爲滄州刺史莊帝還
朝坐免官後歸鄉里及莊帝殺尔朱榮就除鎮東將軍行滄
州事普泰初假征東大將軍滄冀瀛三州刺史大都督將軍

如前尋加車騎將軍右光祿大夫值賊擾本鄉奉母避居齊
州加衛大將軍天平四年卒贈司空公諡曰文獻遵弟紹字
奉世爲武騎侍郎歷汝陰王天賜涼州征西府司馬紹弟獻
字奉章祕書郎獻弟融字奉業汝陰太守融弟肅字奉誠中
書博士雍從弟寶惠字道明與雍俱入魏太祖以爲上客卒
有六子子連城爲冀州開府掾雍族孫雙字子山高祖藪晉
齊郡太守藪因晉亂居青州之樂安父道覆皇興初除平原
太守至雙始還本鄉雙少好學兼涉文史雅爲中山王英所
知賞拜西河太守正光初中山王熙之誅也熙弟略奔雙雙
藏之踰年而購略日甚略乃謂雙曰我兄弟屠滅已盡唯我
一身漏刃相託卿雖厚恩久見容蔽但事留變生終恐難保
脫萬一發覺我死分也無事累卿若送吾出境便是再生之

惠如其不爾輒欲自裁雙曰人生會有一死爲知己死何害
願不以爲慮略固請南行雙乃遣從子昌送之江左靈太后
返政知略因雙獲免徵拜光祿大夫時略姊饒安公主刁宣
妻也頻乞靈太后徵略還乃以徐州所獲江革祖暉二人易
之以雙與略有舊令至境迎肅宗末除西兗州刺史時賊盜
蜂起州人張桃弓等招聚亡命公行劫掠雙至境遣使諭桃
弓禍福桃弓隨使者來歸雙赦之其後有盜發輒令桃弓往
捕悉擒獲於是州境肅清莊帝初行濟州刺史以功封曲城
鄉男出帝初遷驃騎大將軍左光祿大夫興和三年卒贈車
騎大將軍儀同三司齊州刺史諡曰清穆

魏書

王伽章武人開皇末爲齊州參軍州使送流囚李參等七十
餘人詣京師時制流人並枷鎖傳送至滎陽伽悉呼而謂之

愧乎參等辭謝伽乃曰汝等雖犯法枷鎖亦太辛苦吾欲與
汝等脫去汝等能如期至京師否皆拜謝曰必不敢違伽於
是悉脫枷停援卒與期曰某日當至京師如或前卻吾當爲
汝受死流人感悅皆依期而至上聞而驚異召見與語稱善
久之於是悉召流人并令攜負妻子俱入賜宴於殿庭而赦
之乃下詔曰往以海內亂離德教廢絕官人無慈愛之心兆
庶懷奸詐之意所以訟獄不息澆薄難治朕受命上天安養
萬姓思遵聖法以德化人而伽深識朕意誠心宣導參等感
悟自赴憲司有敎無類於斯益信良由官人不善董勸致令
陷罪無由自新若使官盡王伽民皆李參刑措不用其何遠
哉於是擢伽爲雍令有能名

隋書

高世衡渤海人大業末爲櫟陽令時吏多貪墨惟世衡及蕭令彭城劉高城舉令宏農劉熾清節踰勵教化大行獄中無

繫囚焉

隋書

正定府

魏釗鉅鹿下曲陽人魏司空尙書左僕射收之族曾叔祖也本名顯義字宏理博涉羣書才兼文武知名梁楚淮泗間世祖南伐聞而召之與語大悅賜名釗以顯義爲字授內都直侍左右師次淮南諸城未有下者釗乃進曰陛下百萬之師風行電埽雖智者莫能爲計然師次淮南已有日矣而義陽諸城猶堅拒守者蓋以我師果銳殺掠頗多人皆畏威未甚懷惠恐城降之日妻子離散所以遲疑莫肯先下臣請入城見其豪右宣達聖心必當大小相率面縛請罪陛下拔其英

傑推心任之諸城可傳檄而定世祖大喜遂遣釗夜入城明旦城中開門出降諸城皆望風款附世祖大喜曰卿之一言愈千十萬之師矣授義陽太守陵江將軍令與諸將統兵討襲所向輒捷加建忠將軍追贈其父處爲順州刺史遇疾卒年六十四子彥字惠卿博學善屬文趙郡王幹辟開府參軍廣陵王羽辟記室並不行陳劉公李崇甚重之引爲鎮西參軍崇奉命討氏蠻又請爲記室參軍復爲中山王英記室參軍從討淮南軍還求爲著作郎以晉書體制繁雜欲更修之而彭城王復請爲掾兼知主客郎書乃中止王遇害退歸田里清河王復引爲諮議懼及禍以疾辭肅宗初拜驃騎長史轉兖州刺史年六十八卒子三伯允長賢德振伯允歸曲陽留長賢德振於洛使宦學孝靜帝北遷徙鄴長賢博涉經史

詞藻清腴舉秀才除汝南王悅參軍事入齊陽平王淹辟爲
法曹參軍轉著作佐郎承先志更撰晉書河清中上書譏時
政大忤權倖出爲上黨屯留令人皆爲之怏怏而長賢怡然
不改其樂識者稱之武平中辭疾去職遂不復仕周武平齊
屢以書辟以疾固辭貞觀中以子徵貴贈定州刺史

北史

魏季景收族叔也父鸞字雙和皆魏孝文帝賜名以容貌魁
梧爲奉車都尉帝南征漢陽除統軍屢幸其營及不豫敕兼
武衛將軍領宿衛左右後除光州刺史還朝卒諡曰夷季景
少孤清苦自立博學有文才弱冠有名京師時邢子明子才
亦以文鳴人以季景及收匹之呼兩邢二魏厯中書侍郎尙
書右丞給事黃門侍郎除定州大中正天平初因遷都避居
於柏人之西山元象初兼給事黃門侍郎後兼散騎常侍使

梁還厯大司農卿魏郡尹卒家無餘財遺命薄葬贈散騎常

侍衛尉卿有文二百餘篇

北史

張普惠字洪賑常山九門人身長八尺容貌魁偉父睦爲齊州中水縣令隨父之縣受業齊士專心墳典剋厲不息及還鄉里就程元講習精於三禮兼通春秋百家之說諸儒稱之太和十九年爲主書帶制局監轉尙書都令史任城王澄亟稱其學問僕射李冲亦善之世宗初轉積射將軍澄爲安西將軍雍州刺史啟普惠爲府錄事參軍尋行馮翊郡事澄功衰在身欲於七月七日集文武於北園馬射普惠奏記曰竊聞三殺九親別疎昵之敘五服六術等衰麻之心皆因事飾情不易之道也外者不可無節故斷之以三年內者不可遂除故敦之以日月禮大練之日鼓素琴蓋推以卽吉也小功

以上非虞耐練除不沐浴此拘之以制也會子問曰相識有喪服可以與於祭乎孔子曰總不祭又何助於人祭既不與疑無宴食之道又曰廢喪服可以與於饋奠之事乎子曰脫衰與奠非禮也注云爲其忘哀疾愚謂除喪之始不與饋奠小功之內其可觀射乎雜記云大功以下旣葬適人人食之其黨也食之非黨也不食食猶擇人而況射乎伏見明教將以二七令辰集城中文武肄射北園行揖讓於中舍竊謂國家縞禪甫除殿下功哀仍襲釋而爲樂以訓百姓便是易先王之教忘哀戚之情恐非所以昭令德視子孫也按射儀射者以禮樂爲本忘哀從事不可謂禮鐘鼓弗設不可謂樂二者旣闕何用射爲且七日之戲令制無之班勞所施慮違事體庫府空虛宜待新調二七之趣停之爲便乞至九月備飾

盡行則芻蕘無腹誹輿人有獻誦矣澄乃託詞自罷而爲書
答之澄轉揚州啟普惠以羽林監領鎮南大將軍開府主簿
尋加威遠將軍厯佐二藩甚有聲譽而旋京之日旅橐蕭然
澄資絹二十疋以充行資還朝仍羽林監澄遭太妃憂其臣
竇爲立碑頌欲以康王元妃稱之澄訪於普惠普惠言朝典
有王妃而無元字魯夫人孟子稱元妃者下與繼室聲子相
對也今烈懿太妃作配先王更無聲子仲子之嫌竊謂不假
元字以別名位且以氏配姓在生之稱故春秋書夫人姜氏
至自齊旣葬則以諡配姓故經書葬我小君文姜氏又日來
歸夫人成風之禭今烈懿太妃德冠一世故特蒙褒錫豈容
於定名之時而轉置之乎澄從之魏師大舉重征鍾離普惠
爲安樂王諡別將長史及班師除揚烈將軍相州安北府司

馬遷步兵校尉後以本官領河南尹永世宗崩坐與甄楷等
飲酒免官故事免官者三載之後降一階敘若才優擢授不
拘此限熙平中吏部尙書李韶奏普惠有文學宜依才優例
特敘敕除甯遠將軍司空倉曹參軍人以爲榮時任城王澄
爲司空表議書記多出普惠廣陵王恭北海王顥喪所生祖
母或以爲當服期或以爲當三年乃詔羣寮會議普惠議曰
謹案二王祖母皆受命先朝爲二國太妃可謂受命於天子
爲始封之母矣喪服慈母如母在三年章傳曰貴父命也鄭
注云大夫之妾子父在爲母大功則士之妾子爲母期父卒
則皆得申此大夫命其妾子以爲母所慈猶曰貴父命爲之
三年況天子命其子爲列國王命其所生母爲國太妃反自
同公子爲母練冠之與大功乎輕重顛倒不可之甚者也傳